

國
朝
大
事
記

國朝大事記

目錄

- 睿親王攝政始末第五
睿親王攝政始末第六
四臣輔政始末第七
三藩紀事本末第八
三藩紀事本末第九
三藩紀事本末第十
三藩紀事本末第十一
平定海寇紀事本末第十二

睿親王攝政始末第五

任邱金象豫介公輯錄

崇德八年八月初九日

太宗文皇帝升遐禮親王代善等奉

世祖章皇帝嗣位王貝勒大臣等共爲誓書昭告天地以

鄭親王濟爾哈朗睿親王多爾袞輔政亦與諸王大

臣誓告天地丙子遣護軍統領阿濟格尼堪等率

兵戍錦州丁丑多羅郡王阿達禮謂睿親王曰王

正大位我當從固山貝子碩託亦遣吳丹謂睿親王

曰內大臣圖爾格及御前侍衛等皆從我謀矣王可

自立。阿達禮碩託偕貝勒羅洛宏同視禮親王足疾。
阿達禮碩託登牀耳語禮親王曰：衆已定議立睿王
矣。王何嘿嘿？於是禮睿二王白其言於衆。質訊俱實。
阿達禮碩託坐擾亂國政伏誅。並誅阿達禮母碩託
妻及所遣吳丹羅洛宏以不知情免罪。籍阿達禮家
給禮親王。籍碩託家并其子拉哈齊蘭布給睿親王。
大學士剛林亦收繫。因曾白於諸內大臣亦免罪。撥
入正黃旗。大學士范文程撥入鑲黃旗。以阿達禮弟
勒克德渾杜蘭給肅親王。九月，鄭親王等統大兵
征明寧遠衛。十月一日，拔其城進克前屯衛。護軍統

領阿濟格尼堪布善率將士拔中前所以所獲人畜
分賜出征王大臣及官員有差遣輔國公篇古博
和託固山額真伊拜和碩額駙杜雷將兵更戍錦州
十一月遣梅勒章京俄羅塞臣巴里都統兵征黑
龍江十二月遣固山額真譚泰統將士更戍錦州
順治元年正月遣叅領沙爾虎達統將士征庫爾喀
遣副都統李率泰統將士更戍錦州遣來達哈
巴圖魯等領兵永駐錦州增設刑部漢軍理事官
二員工部漢軍理事官每旗各一員二月增設內
三院學士各一員四月固山額真何洛會等訐告

肅親王豪格言詞悖妄會鞠俱實遂幽禁既而釋之
廢爲庶人 睿親王奉

旨征明

大學士范文程啟王曰乃者有明流寇踞於西
北水陸諸寇環於南服兵民煽亂於北陲我師屢伐
其東鄙四面受敵此正諸王建功立業之候也竊惟
承丕業以垂休萬禩者在此時失機會而貽悔將來
者亦此時今日當申嚴紀律秋毫勿犯復宣諭以昔
日不守內地之由及今進取中原之意官仍其職民
復其業錄其賢能恤其無告夫如是則大河以北可
傳檄定也河北一定移居職官更妻孥避患於戎軍

因以爲節。又拔其德譽素著者置之班行。則見聞可
廣。而政事有時措之宜矣。此行或直趨燕京。或相機
攻取。當於長城以西擇堅城頓兵爲門戶。我師往來
斯便。庚午師次燕。遼河聞閭賊已陷燕京。洪承疇
啟曰。我兵之強。流寇可一戰而除。今宜先遣官宣布
王令。示以此行特期於滅賊。有抗拒者必加誅戮。不
屠人民。不焚廬舍。不掠財物之意。仍布告各府縣。開
門歸降。官則加陞。軍民秋毫無犯。若抗拒不服。城下
日。官吏誅。百姓仍予安全。有首倡內應者。則破格封
賞。此要務也。流寇今得京城財足氣驕。已無固志。一

聞我軍至。必焚宮殿府庫而遁。賊驃馬不下三十餘萬。晝夜兼程。可二三百里。我兵抵京。賊已遠去。逆惡不得除。財物無所獲。大可惜也。今宜計道里限時。日輜重在後。精兵在前。從薊州畧雲近京處疾行而前。賊走則追勦。倘仍據京城。則撲滅更易。今恐賊遣精銳伏山谷狹處。以步兵扼路。我國騎兵不克履險。宜於騎兵內選作步兵。從高峴其埋伏。俾步兵在前。騎兵在後。比入邊。則步兵皆騎兵也。孰能禦之。流寇十餘年來。用兵已久。雖不能與大軍抗。亦未可以昔日漢兵輕視也。壬申師次翁後。明吳三桂遣使來致。

書求助。癸酉，師次西拉塔拉，報吳三桂書。戊寅，

師距山海關十里，敗賊將唐通於一片石。己卯，師至山海關。吳三桂出迎，遂與之合兵，擊賊，賊大敗。追殺四十里。賊遁，遂趨燕京。誓諭諸將，勿殺無辜，勿掠財物，勿焚廬舍。不如約者，罪之。仍曉諭官民，以取殘不殺，共享太平之意。丁亥，師次羅公店，聞賊已西走，令諸王貝勒率兵急追之。五月辛丑，徵明故大學士馮銓。銓聞命即至。保定副將王應登、陳七事一立綱紀，二任賢良，三靖遺寇，四申招撫，五和兵民，六重農務，七懲貪婪。宣府巡撫李鐸捕斬偽權。

將軍黃應選等十五人以祭崇禎帝諸王等追破賊於望都固山額真譚泰等破賊真定賊焚輜重走燕京迤北居庸關內外各城及天津真定等處皆降

六月令洪承疇仍以太子太保兵部尚書兼都察院右副都御史佐理機政大學士馮銓洪承疇言明時舊例凡內外文武官民條奏併各部院覆奏本章皆下內閣票擬已經批紅者仍由閣分下六科鈔發各部院所以防微杜漸以後用人行政要務乞發內院票擬奏請裁定從之御史曹溶陳六事一定官制一議國用一戢兵丁一散土寇一廣收糴一通

煤運下所司。大同姜瓖言近殺賊首柯天相等。撫
定大同等處。恐無主生亂。因以棗強王朱鼎誦續先
帝之祀。適接告諭。前朝諸王仍照舊爵。一經頒示。無
不欣戴。報曰。議委棗強王國政。大不合理。不特棗強
王在明係何等級。仍當照舊。即明之嫡系將軍亦宜
照舊。不許干預一切國政軍務。致違我法。給事中
劉昌陳十事。立規模。審廟算。推誠心。集羣策。施實惠。
定經賦。定官制。頒俸祿。明等威。重守令。遣固山額
真覺羅把哈納石廷柱率將士平山東一路。定議
建都燕京。遣輔國公吞齊喀和託等齎奏迎。

乘興

遣固山額真葉臣率將士平山西一路。順天巡按柳宣東言。近見陞除。凡前朝犯職除名流寇偽官。一槩錄用。雖云寬大。爲治。然非慎加選擇之道。鼎革以來。政教未敷。作惡靡所顧忌。宜速定律令。報曰。經綸方始。治理需人。歸順官員。既經擢用。不必苛求。此後官吏犯職。審實立斬。問刑准依明律。順天巡撫宋權獻治平三策。一請議崇禎廟號。一禁革加派弊政。一廣羅賢才。遣大學士馮銓祭明太祖及諸帝。葉臣報饒陽一路土賊悉平。錦衣衛百戶危列。宿言。臣招撫至天津。諮訪流寓。及在籍官員。黨崇雅。

等四十三員。諭著吏部確核才品。即予起用。仍行文各撫按。凡境內隱逸賢良。逐一啟薦。但不許以貪官酷吏及貨郎雜流充數。巴哈納石廷柱。報霸州滄州德州臨清先後俱下。七月。巴哈納等會葉臣平山西。修政歷法。湯若望進所製混天星球一座。地平日晷窺遠鏡各一具。併輿地屏圖。並請所有應用諸歷。永依西洋算法從之。天津總督佟養性請豁免明季加派錢糧。止徵正額。并火耗。報曰。官吏犯贓。審實論斬。前諭甚明。所啟錢糧正供。每兩火耗三分。正是積弊。何云舊例。況正賦尚宜酌蠲。額外豈容多。

取着嚴行禁革。如違。即以犯賊論。招撫山東河南
侍郎王鼈。永報濟南東昌青州臨清等州縣。以次撫
定。并賁送。故明德王朱由棨降表。又言近聞南中已
擁立福王。改元弘光。以史可法爲內閣總兵。劉澤清
劉良佐黃得功高傑等分據各鎮。請亟補鎮臣。控扼
淮徐。下所司確議。遣南來副將韓拱薇等致書明
大學士史可法曰。予向在瀋陽。即知燕京物望咸推
司馬。後入關破賊。得與都人士相接。識介弟於清班。
曾託其手勒平安。拳致衷緒。未識以何時得達。比聞
道路紛紛。多謂金陵有自立者。夫君父之讐。不共戴

天春秋之義有賊不討則故君不得書葬。新君不得書即位。所以防亂。臣賊之法至嚴也。闖賊李自成稱兵犯闕。手毒君親。中國臣民不聞加遺一矢。平西王吳三桂介在東陲。獨效包胥之哭。朝廷感其忠義。念累世之宿好。棄近日之小嫌。爰整貔貅。驅除狗鼠。入京之日。首崇懷宗。帝后謚號。卜葬山陵。悉如典禮。親郡王將軍以下。一仍故封。不加改削。勛戚文武諸臣咸在朝列。恩禮有加。耕市不驚。秋毫無擾。方擬秋高氣爽。遣將西征。傳檄江南。聯兵河朔。陳師鞠旅。戮力同心。報乃君國之仇。彰我朝廷之德。豈意南州諸君

子苟安旦夕。不審事機。聊慕虛名。頓忘實害。予甚惑之。國家之撫定燕京。乃得之於關賊。非取之於明朝也。賊燬明朝之廟主。辱及先人。我國家不憚征繕之勞。悉索敝賦。代爲雪恥。孝子仁人。當何如感恩思報。茲乃乘逆寇稽誅。王師暫息。遂欲雄據江南。坐享漁人之利。揆之情理。豈可謂平。將以謂天塹不能飛渡。投鞭不足斷流耶。夫關賊但爲明朝崇耳。未嘗得罪於我國家也。徒以薄海同仇。特申大義。今若擁號稱尊。便是天有二日。儼爲勁敵。予將簡西行之銳。轉旆東征。且擬釋彼重誅。命爲前導。夫以中華全力。受困

潢池而欲以江左一隅兼支大國勝負之數無待著
龜知予聞君子之愛人也以德細人則以姑息諸君
子果識時知命篤念故主厚愛賢王宜勸令削號歸
藩永綏福祿朝廷當待以虞賓統承禮物帶礪山河
位在諸侯王上庶不負朝廷申義討賊興滅繼絕之
初心至南州羣彥翩然來儀則爾公爾侯列爵分土
有平西王之典例在惟執事實圖利之輒近士大夫
好高樹名義而不顧國家之急每有大事輒同築舍
昔宋人議論未定兵已渡河可爲殷鑒先生領袖名
流主持至計必能深維始終寧忍隨俗浮沈取舍從

遠應早審定。兵行在即。可西可東。南國安危在此一舉。願諸君子同以討賊爲心。毋貪一身瞬息之榮。而重故國無窮之禍。爲亂臣賊子所笑。予實有厚望焉。記有之。惟善人能受盡言。敬布腹心。佇聞明教。江天在望。延跂爲勞。書不宣意。可法旋遣人答書曰。大明國督師兵部尚書兼東閣大學士史可法頓首謹啟。

大清國攝政王殿下。南中向接好音。法隨遣使問訊。吳大將軍未敢遽通左右。非委隆儀於草莽也。誠以大

夫無私交。春秋之義。今倥偬之際。忽奉琬琰之章。真

不帝從天而降也。循讀再三。殷殷致意。若以逆賊尚稽天討。煩貴國憂法。且感且愧。懼左右不察。謂南中臣民偷安江左。竟忘君父之怨。敬爲貴國一詳陳之。我大行皇帝。敬天法祖。勤政愛民。真堯舜之主也。以臣庸謬。國致有三月十九日之事。法待罪南樞。救援無及。師次淮上。凶聞遂來。地坼天崩。山枯海泣。嗟乎人孰無君。雖肆法於市朝。以爲泄泄者之戒。亦奚足以謝先皇帝於地下哉。爾時南中臣民哀慟如喪考妣。無不拊膺切齒。欲悉東南之甲。立翦兇仇。而二三老臣謂國破君亡。宗社爲重。相與迎立今上。以繫中

外之心。今上非他神宗之孫。光宗猶子。而大行皇帝之兄也。名正言順。天與人歸。五月朔日。駕臨南都。萬姓夾道歡呼。聲聞數里。羣臣勸進。今上悲不自勝。讓再讓三。僅允監國。臣民伏闕屢請。始以十五日正位南都。從前鳳集河清。瑞應非一。及告廟之日。紫雲如蓋。祝文升霄。萬目共瞻。欣傳勝事。大江湧出。桺梓數十萬章。助修宮殿。豈非天意也哉。越數日。遂命法視師江北。刻日西征。忽傳我大將軍吳三桂借兵貴國。破走逆成。爲我先皇帝后發喪成禮。掃清宮闕。撫輯羣黎。且罷薙髮之令。示不忘本朝。此等舉動。振古鏢

今凡爲大明臣子無不長跪北向頂禮加額豈但如
明諭所云感恩圖報已乎謹於八月薄治筐篚遣使
犒師兼欲請命鴻裁連兵西討是以王師既發復次
江淮乃辱明誨引春秋大義來相詰責善哉乎推言
之然此文爲列國君薨世子應立有賊未討不忍死
其君者立說耳若夫天下共主身殉社稷青宮皇子
慘變非常而猶拘牽不即位之文坐昧大一統之義
中原鼎沸倉卒出師將何以維繫人心號召忠義紫
陽綱目踵事春秋如莽移漢鼎光武中興玉廢山陽
昭烈踐阼懷愍亡國晉元嗣基徽欽蒙塵宋高繼統

是皆於國仇未翦之曰。亟正位號。綱目未嘗斥爲自立。率以正統予之。甚至如元宗幸蜀。太子即位靈武。議者疵之。未嘗不許以行權。幸其光復舊物也。本朝傳世十六。正統相承。自治冠帶之族。繼絕存亡。仁恩遐被。貴國先在本朝。夙膺封號。載在盟府。寧不聞乎。今痛心本朝之難。驅除亂逆。可謂大義復著於春秋矣。昔契丹和宋。只歲需以金縵。回紇助唐。原不利其土地。况貴國篤念世好。兵以義動。萬代瞻仰。在此一舉。若乃乘我蒙難。棄好崇仇。規此幅員。爲德不卒。是以義始而以利終。恐爲賊人所竊笑也。貴國豈其然。

往先帝軫念潢池不忍盡戮勦撫互用貽悞至今今
上天縱英武刻刻以復仇爲念廟堂之上和衷體國
介冑之士飲泣枕戈忠義民兵願爲國死竊以天亡
逆闖當不越於斯時矣語曰樹德務滋除惡務盡今
逆成未服謀知捲土西秦方圖報復此不獨本朝不
共戴天之恨抑亦貴國除惡未盡之憂也伏乞堅同
仇之誼全始終之德合師進討問罪秦中梟逆賊之
頭以洩數天之憤則貴國義聞照耀千秋本朝圖報
惟力是視從此兩國世通盟好傳之無窮不亦休乎
至於牛耳之盟本朝使臣久已在道不日抵燕奉盤

孟從事矣。法北望陵廟。無涕可揮。身蹈大戮。罪應萬死。所以不即從先帝者。實爲社稷之故。傳曰。竭股肱之加。繼之以忠貞。法處今日。鞠躬致命。克盡臣節。所以報也。惟殿下寶昭鑒之。弘光甲申九月十五日。戶科給事中郝傑陳四事。一勸農以植根本。一撫逃亡以實戶口。一禁罰贖以除苛政。一嚴奢侈以正風俗。以有裨新政。飭部即行。山東巡按朱朗鑠言。中外臣工。皆以衣冠禮樂。覃敷文教。頃聞東省新補監司二人。俱關東舊臣。若不加冠服。恐人心驚駭。誤以文德興教之官。疑爲統兵征戰之將。乞諭二臣各製

本品紗帽圓領。報曰兵務方殷。未遑衣冠禮樂。近簡各官姑依明式速製本品紗帽官服。以便蒞事。尋常出入仍遵國家舊例。湯若望言。敬授民時。全以節氣交宮與太陽出入晝夜時刻爲重。若節氣之時日不真。則太陽出入晝夜刻分俱謬矣。歷稽大統回回舊歷所用節氣止泥一方。且北直之節氣。春分秋分前後俱差一二日。況諸方乎。新法之推太陽出入地平環也。則有此晝而彼夜。此入而彼出之理。若舊法以一處而槩諸方。故種種差謬。難以枚舉。今以臣局新法所有諸節氣及太陽出入晝夜時刻俱照道里

遠近推算共增數百。加於篇首從之。八月自成偽
總兵李過自新安糾賊三萬犯府谷。逼大同。大兵擊
之。殲殪過半。李過中創。竄歸綏德。旋聲言欲渡黃河
來犯。九月庚寅遣甲喇章京顧納代等迎。

乘輿 甲午

上入山海關 十月乙卯朔

上定鼎燕京 梅勒章京和託等言。臣等率師至山東。流

賊旗鼓。趙應元等詐降。入青州。殺招撫侍郎王龍水。
據其城。臣等往援。擒斬應元等。復青州。葉臣報。臣
等出固關。西平三晉。所至迎降。偽伯陳永福據太原。

我軍攻克之五州二十縣皆降。以英親王阿濟格
爲靖遠大將軍征流寇。以豫親王爲定國大將軍
征南。十一月山西巡撫馬國柱言。我軍勦賊汾州。
追青龍永寧進至平陽。全省悉平。十二月葉臣言。
大軍自直隸至河南山西共平府九州二十七縣一
百四十一。豫親王言。前鋒渡黃河沿河寨堡迎風
歸附。僞總兵許定國土寨首領李際王各遣人來降。
大軍向潼關進發。遣都統阿山馬喇希副都統阿
哈尼堪等由蒲州濟河協勦流寇。有劉姓人自稱
明崇禎帝太子下法司勘問得假冒狀伏誅。任珍

張勇王平蒲艾惠應詔俱在陝西歸順。

順治二年正月遣饒餘郡王阿巴泰固山額真準塔
梅勒章京譚布率將士往山東代肅親王豪格。山
東膠州總兵官柯永盛勦靈山衛土石山賊平之。
豪格報睢州偽總兵許定國遣子投誠并言高賊發
兵五千圍城請師往救以未奉旨不敢擅往。又報
尚書車爾格等攻破滿家洞土寇十餘處俘獲婦女
牛馬。真定巡撫衛周允報真定大名順德廣平四
府山寨賊寇悉平。二月豫親王報大軍於元年十
二月十五日追流賊至陝州前鋒叅領索渾等敗賊

於靈寶縣二十二日師抵潼關前鋒統領努山等敗賊偽汝侯正月初四日敗賊將劉方亮李自成親率兵拒戰屢敗之十一日逼潼關口自成遁走西安賊守將馬士堯偽降十三日大軍入關斬士堯十八日師至西安自成竄商州以故明修撰陳名夏慕義遠來擢吏部左侍郎兼翰林院侍讀學士許定國報高傑已用計擒斬請發大軍以靖殘寇諭豫親王初曾密諭爾等往取南京今既敗破流賊已得西安可將彼處事宜交與靖遠大將軍英親王等即遵前命趨往江南流寇餘氛責令英親王等追剿鎮

守平陽將軍阿山報。豫親王已統兵攻下西安。臣所
統科爾沁兵內復簡精騎送豫親王軍中。其山西一
路寇賊絕跡。民俱復業矣。英親王報大軍擊賊八
戰皆捷。秦屬州縣攻下者四城。降者三十八城。俱已
安撫。阿巴泰奏。三月初三。聞南兵渡河。圍徐州沛
縣李家樓。隨遣固山額真準塔等前敗賊馬兵二千
於徐州十五里外。擒斬逆渠六人。豫親王報。二月
十四日。大軍由西安府直抵河南。招降偽平南伯劉
忠旋得平江南之諭。即於三月初五日率師南征。
故明文淵閣大學士李建泰來京。陛見慰諭之。豫

親王報三月初七日臣統兵出虎牢關口固山額真
拜尹圖等出龍門關口尚書韓岱等由南陽路三路
兵同趨歸德所過州縣皆投順五月輔政王濟爾
哈朗等議以皇叔攝政王雖賞罰等於朝廷而體統
尚未崇隆一切儀制亦應如禮啟聞王固辭曰予在
上前未敢違禮他處如議行可也翌日王入朝滿洲諸臣
皆跪王亟回輿因謂大學士曰今予乃入君之朝也
如此行禮予心何安遂引輿而返於是令曉諸漢臣
妖民劉伯泗掘穴得石匣內函天書又石匣內有
元帥印遂自稱天罡星宣府巡撫馮聖兆捕獲以聞

命斬之。豫親王奏大軍於四月初五日自歸德府起沿途州縣俱投順。十三日離泗州四十里。令固山額真阿山等前奪泗北淮河橋。其守泗總兵焚橋遁。我軍遂夜渡淮。十七日遣韓岱等率師至揚州城北。獲船百餘。是日大軍距揚州二十里列營。令署護軍統領顧納代等率師至揚州城南。獲船二百餘。十八日大軍薄揚州城下。招諭其閣部史可法翰林學士衛允文及四總兵二道員等不從。二十五日令拜尹圖圖賴阿山等攻克揚州城。獲史可法斬於軍前。其據城逆命者並誅之。五月初五日進至揚子江。時福

王下鎮海伯鄭鴻逵以水師守瓜洲曹總兵以水師
守儀徵初六日我軍陣北岸相拒三日初八日晚令
拜尹圖圖賴阿山等率舟師由運河潛至南岸列於
江之西距瓜洲十五里初九日復令梅勒章京李率
春率兵五鼓登岸黎明渡江初十日聞福王率馬士
英及諸太監潛遁十五日我軍至南京忻城伯趙之
龍率魏國公徐州爵內閣大學士王鐸禮部尚書錢
謙益等並城內官兵迎降其沿途來歸者興平伯高
傑子元照等二十三員監軍道二員副將四十七員
叅遊共八十六員馬步兵共二十三萬八千三百

六月豫親王奏南京既克福王潛遁太平遂遣多羅貝勒尼堪等率兵追之福王復走蕪湖護軍統領圖賴據江口截其去路偽靖國公黃得功逆戰中流矢死偽總兵田雄馬得功縛福王及其妃來獻併率十總兵部衆降鎮守廬鳳淮陽等處固山額真準塔等奏五月間臣自徐州水陸並進遣兵敗劉澤清副將高佑於宿遷師次清河遣梅勒章京康額賴等敗澤清總兵馬儀豹等於淮黃清三河口復敗敵兵合軍追入淮安界斬副將二員叅將一員次清江監司范鳴珂降澤清同偽總漕田仰遁走總兵柏永馥率

官兵出迎遂克取淮安其鳳陽廬州一帶望風納款
陝督孟喬芳奏妖賊胡守龍等假焚祝之名聚眾
數萬自稱會公僭號清光元年一日臣方坐署喧傳
有數龍自天而降少頃鄉約首送前龍乃皇極妖經
一卷也臣隨懸賞於榆新守龍妖黨悉平總督河
道楊方輿言山東滿家洞界連四縣穴有千餘周迴
二三百里明季荒亂窮民聚其內其最著者有羊山
金山大義集合家集羅家屯桑科集等處滿家洞其
總名也自元年七八月劫焚無虛日臣遣兵四次敗
之二年肅親王駐濟南發滿兵勦其巢賊竄竄伏洞

中。後饒餘郡王至。攻益力。隨破隨填其穴。餘二大洞。爲賊老巢。內有重關夾道。暗伏火器。人不敢入。因絕其汲道。五月。饒餘郡王還京。復增兵圍守。洞口水絕。賊皆自縊死。諸洞悉平。以內院大學士太子太保兵部尚書兼都察院右副都御史洪承疇總督軍務。招撫江南各省地方。恭順侯吳惟華爲太子太保兼都察院右副都御史提督軍務。招撫江西。尚寶卿黃熙允爲兵部右侍郎。招撫福建。原任大同巡撫江禹緒仍以兵部右侍郎提督軍務。招撫湖廣。刑部郎中丁之龍爲兵部右侍郎。招撫雲貴。俱兼右僉都御史。

豫親王奏大軍已定南京。隨令貝勒博洛固山額
真拜尹圖阿山等率兵趨杭州。敗迎敵兩路兵。賊悉
渡錢塘江。逃竄。我軍駐營江岸。潮水連日不至。人皆
驚。爲天助。潞王大恐。開門納款。湖嘉紹寧嚴等府皆
歸順。紹興淮王渡江來見。復遣人至湖州。繫周王眷
屬。總兵王之仁率部兵二千五百人降。又聞杜陽王
在廬州和州作亂。遣總兵吳兆勝勦擒之。改南京
爲江南省。應天府爲江寧府。設官事宜俱照各省例
行。

順治三年正月。以肅親王豪格爲靖遠大將軍。同郡

王羅洛宏貝勒尼堪征四川以張獻忠肆虐巴蜀也

二月洪承疇言官兵勦斬潛山太湖閒司空皆賊首石應璉等五人生擒故樊山王朱常炎斬於軍前

駐防江寧府侍郎巴山梅勒章京康額賴等奏報

正月十二日夜江寧府城內民與外賊通謀作亂事覺捕斬爲首者三十人至十八日夜賊首僞潞安王瑞昌王復率賊二萬餘三路入犯俱擊敗之定西

大將軍何洛會奏副將王平敗王姓秀才賊兵於渭南縣中軍陳德副將任珍破賊首劉文炳於蒲城敗

賊首李達於同州臣等領官兵追賊渠賀珍於武功

濠泗河大敗之。以貝勒博洛爲征南大將軍。同固
山額真公圖賴率師征福建浙江。三月何洛會擒獲
黑水峪賊首孫守法胡向宸等。勒克德渾奏臣於去
年十二月自江寧乘舟向湖廣進發。正月抵武昌。偵
知馬王二總兵自岳州叛奔何騰蛟。遣兵追擊敗之。
二十九日師至石首。聞賊渡江。圍荊州。我軍乘夜馳
躡賊營。大破之。分路追殺殘寇殆盡。李自成弟李孜
偽磁侯田見秀等率馬步兵五千餘名詣軍降。獲玉
璽一。惟一隻虎未獲。張存仁劾李成棟吳勝兆縱
兵擾民。四月寧夏總兵劉芳名報寧夏兵變。殺巡

撫焦安民。隨經撫定。斬首惡楊成名白友太。五月
以蘇尼特部落騰機思等叛。奔喀爾喀。召豫親王爲
揚威大將軍。率大兵征之。江西總兵金聲桓奏官
兵取南贛。生擒僞軍門劉廣允。六月。浙閩總督張
存仁報副將張國勛進勦太湖逆賊。獲僞長興伯吳
日生主事倪曼青。僞大學士馬士英。潛遁新昌縣內。
都統海岱追至台州。士英屬下總兵葉承恩等降。并
報稱士英披剃爲僧。即至寺拘獲。并總兵趙體元俱
斬之。博洛報大軍五月抵杭州。適賊兵營於錢塘
江東岸。我軍策馬徑度。僞國公方國安遁歸紹興。攜

魯王朱以海走保台州。江東底定。閏六月英親王
報李自成親率賊二十萬。聲言欲取南京。我兵水陸
躡其後。追及於州。永天德安武昌富池口桑家口
九江等七處窮追至賊老營。大破八次。賊兵盡力窮。
竄入九宮山。山在武昌府通山縣南九十里隨於山中。遍索自成不
得。有降卒言自成攜步卒二十人爲村民所困。自縊
死。屍朽莫辨。又有故明寧南侯左良玉子孟康守道
李猶龍巡按黃澍率總兵十二員兵十萬泊舟於九
江東流縣楊子江中俱降。庚寅以流寇蕩平。諭英
親王令班師。秋七月以貝勒勒克德渾爲平南大

將軍同固山額真葉臣等往江南代豫親王。洪承疇疏請回京。以江南尚未大定。不允。準塔報故明東平侯劉澤清率所部歸順。原任總兵馬登洪林慶業皆投降。內大臣何洛會河南巡撫羅緒錦等奏我兵進克西平縣。賊首劉洪起等伏誅。汝寧等處悉平。八月。給事中許作梅莊憲祖杜立德御史王守履桑雲李森先羅國士。李槐吳達等交章劾奏。內宏文院大學士馮銓原係故明閹寺魏忠賢黨羽。其子源淮進賄於禮部侍郎孫之獬。遂收爲伊標中軍。又禮部侍郎李若琳係銓黨羽。俱宜罷黜究治。請將

馮銓父子肆諸市朝。下刑部鞠問無實。擬各官反坐。
攝政王傳集大學士等及各官。逐一鞠問。馮銓孫之
獬言於眾人。未薙髮之先。即行薙髮。男婦皆效滿裝。
李若琳亦先薙髮。故結黨陷害。王諭曰。爾科道如何。
仍蹈故轍。陷害無辜。給事中龔鼎孳曰。馮銓乃黨附
魏忠賢作惡之人。銓曰。鼎孳何反順。陷害君父之李
賊。竟爲北城御史。王曰。此言實否。鼎孳曰。實。豈止鼎
孳一人。何人不曾歸順。魏徵亦曾歸順。唐太宗王笑
曰。人果自立忠貞。然後可以責人。鼎孳自比魏徵。以
李賊比唐太宗。殊爲可恥。此等人何得侈口論人。但

縮頸靜坐。以免人言可也。此番姑免爾等罪。如不改悔。定不爾貸。越數日。以李森先啟內。請將馮銓父子肆諸市朝之語過甚。草森先職。九月。浙閩總督張存仁奏。叛賊方國安王之仁。盤踞富陽。遣兵掩殺陣擒國安子大衍等。斬之。準塔等奏。故明新昌王王潛遁海中。島雲臺山作亂。官兵進剿。獲新昌王於淮安斬之。十月。遣八旗兵駐防順德。濟南。德州。臨清。徐州。潞安。平陽。蒲州。八處。每一旗分駐一城。招撫大學士洪承疇疏報。故明翰林金聲。甘心悖逆。陰受唐王偽勅。起鄉兵以拒我師。茲提督張天祿等由旌德。

進兵連破十餘砦。馳至績溪。生擒金聲。斬之。徽州平。
遣固山額真巴顏墨勒根蝦等率兵往陝西。會同
駐防西安內大臣何洛會勦四川。以何洛會爲定西
大將軍。十二月。洪承疇奏提督張天祿敗閩唐王
朱聿劍兵於徽州。擒偽閣部黃道周。令斬於軍前。
多鐸師至。營噶爾察克山。聞騰機思等屯於衮噶魯
台。大軍乘之。騰機思等聞風遁。令外藩郡王滿朱習
禮梅勒章京明安達禮追及於歐克特山。大破之。斬
其台吉毛害。迎下嫁格格。還我兵。復渡土喇河。追之。
斬騰機思及其孫。獲其家口輜重及牲畜十餘萬。

多鐸又奏我師自土喇河西擊敗土謝圖汗

喀爾喀部落汗

兩子兵二萬於查濟布拉克。次日復擊敗碩雷汗之四子本霸巴圖魯台吉兵三萬。皆斬獲無算。因馬疲班師。博洛疏報大兵克金華衛州二府。斬偽蜀王朱盛濃。樂安王朱誼石等。全浙底定。張存仁奏偽閭臣謝三保。閭部宋之晉。兵部尚書阮大鍼。刑部尚書蘇壯投誠。洪承疇疏報擒獲謀犯省城。偽瑞昌王朱誼泐並其黨斬之。肅親王奏大軍於三月抵西安。遣尚書星納勦汾州賊寇。降數百人。遣固山額真杜雷勦慶陽一帶賊。斬其渠石二等。遣固山額真

巴顏等撲勦延安一帶諸寇。五月，賊首劉文炳、康千
總、郭文星、張破臉等拒敵，擊敗之。大軍於五月初自
西安起行，分遣貝勒尼堪等由棧道向漢中。偵知賀
珍圍漢中，以兵守雞頭關。尼堪等擊殲之，遂抵漢中。
賀珍遁潰，遣兵擊敗之。聞二隻虎孫守法破興安關，
我兵至，皆遁。七月十六日夜，我軍攻克張果老崖。斬
康千總，臣率兵一半向秦州進發。分遣貝子滿達等
搜勦賊黨，降賊石國璽。高如礪、蔣登、雷王可臣等遂
攻克三台山，斬獲無算。川湖總督羅繡錦奏：何騰
蛟等寇岳州，鎮將敗之。金聲桓奏：克贛州，斬偽閣

部楊廷麟凱旋自勒勒克德渾等賜金有差博
洛秦大軍由衢州廣信兩路進福建敗偽閩部黃鳴
駿等於仙霞關遂破浦城斬偽巡撫楊廷清李暉下
建寧延平等府唐王聿劍走汀州遣兵擒斬之福建
悉平肅親王奏我軍抵西充逆賊張獻忠率眾來
拒護軍統領鰲拜等奮擊大敗之斬張獻忠於陳復
分兵破賊營二百三十餘處四川平

睿親王攝政始末

任邱金象豫介公輯錄

順治四年正月湖廣總督柯永盛奏興國等處寨寇
悉平。初陳友諒遺孽分爲柯陳二姓盤踞江西武寧
湖廣興國而興國尤蓄術黠悍。迄明世爲患將三百
年。有柯抱冲者與何騰蛟結連自立爲王以黨陳珩
王爲帥攻陷興國州殺武昌同知張夢白永盛同按
臣吳贊遣將征討八戰皆敗之焚其巢擒抱冲珩王
斬之。二月征南大將軍博洛報廣州府僞唐王朱
聿釗弟聿錫號昭武總督佟養甲等率師進勦斬聿

字侯考

上旨曉諭之

洪承疇及巡撫尚國寶事聞覺其詐以

鐔并偽周王肅眾益王思炎等廣郡悉平三月大
兵自岳州取長沙四月故明漕撫田仰帶兵三千
名投順五月故明廢紳侯峒曾等遣奸細通魯王
爲柘林遊擊陳可所獲中有偽勅一道反聞大學士
部院職銜結連太湖巨寇潛通舟山餘孽章京素布
圖討擒之于龍投水死諸寇聞風解散湖廣巡撫
高士俊奏大兵攻拔衡山安化等縣衡州常德二府
生擒偽總兵黃朝宣蘇松提督吳兆勝謀反鞠實

伏誅

七月封德豫親王多鐸爲輔政叔德豫親王。

罷和碩鄭親王輔政。

湖廣叛逆王光泰盤踞鄖陽。

妄用永歷年號僭稱鎮武伯官兵進剿提督孫定遠陣歿。禁民間行使制錢不許以一當二違者治罪。

張存仁言

州洞賊李長蛟僞軍師王國用陳泰

鍾等糾賊萬餘犯建寧府。初四日有土寇無數白旗爲號突來奪門城內奸細放入遂爲賊踞。海賊亦於是日進口燒斷漳州東橋。皆係鄭彩諸逆爲祟。長泰海澄龍溪盡爲賊出沒之所。分寇惠安安溪。八月左副都御史惠世揚以老致仕。肅親王豪格奏分

兵征勦遵義夔州茂州榮昌隆昌富順內江資陽等處。川寇悉平。九月，淮安土賊張華山等攻據廟灣，遊擊潘廷吉同知耿嘉樂棄城走。革職提問。山東巡撫張儒秀奏土賊丁可澤勾引叛賊謝遷等陷淄川縣。原任招撫江西兵部尚書孫之獬被賊支解死。十月，侍郎喀喀木自河南州至鄖陽，會防守光化之副將王平引兵渡河追賊王光泰及其黨偽總兵李士英等。光泰初聞大兵至內鄉，即遁走房縣。喀喀木遂復鄖陽。偕王平追賊至房縣，斬級萬餘。光泰等竄四川。喀喀木留駐鄖陽，勦撫餘黨，以次就平。

十一月遣侍郎陳泰梅勒章京棟阿賴等率兵征福建。洪承疇奏犯僧面可係臣會試房師明禮部尚書韓日縉之子。臣給印牌令回廣東。因出城門盤驗經笥中有福王答阮大鍼書稿。又有變紀一書。干預時事。亟可自取愆尤。臣有世誦理應避嫌。着拿解來京。漕督楊聲遠奏擒偽義王朱術並其_子梟命斬之。十二月福撫佟國鼎奏逆賊鄭彩攻圍省城。副將鄒必科等擊敗之。餘賊潰散。

順治五年正月靖遠大將軍肅親王率師還京。二月土賊攻陷慶雲縣。知縣張必科死之。賊尋遁。令嚴

加防勦之。江西總兵金聲桓反。僞稱豫國公。王得
仁僞稱建武侯。用僞隆武年號。攻臨郡邑。遣梅勒
章京羅壁勦霸州一路土寇。偏沅巡撫線縉奏。僞
貴溪王朱常彪僞恢武伯向登位。兩路寇沅州。官兵
擒斬之。山東土賊犯東平。知州李芝桂戰歿。固
山貝子吞齊哈等。訐告鄭親王。會議擬死。革親王爵。
降爲郡王。罰銀五千。肅親王有罪。衆議論死。免死。
幽繫之。奪所屬人員。以固山額真譚泰爲征南大
將軍。同固山額真何洛會領兵征金聲桓。四月。遏
必隆有罪。免死籍沒。浙閩總督陳錦報克復建寧。

擒斬僞鄒西王朱常湖僞國師王祈等。遣固山額
真庫魯克達爾漢阿賴尚書宗室吳達海等統兵戍
漢州。遣固山額真劉之源修圖賴爲定南將軍率
兵駐寶慶固山額真墨爾根侍衛李國翰爲定西將
軍率兵駐防漢中。鳳陽巡撫陳之龍奏擒得僞總
督黃毓祺并家人袁五搜獲銅印一顆反詩一本供
出江北窩黨薛繼周等江南王覺生錢謙益等現在
密咨拿緝。閏四月羅繡錦奏興國逆賊劉大刀與
僞總督鮑瑞玉合謀爲亂遊擊張國忠等勦斬瑞玉
擒僞副將等十人。陝督孟喬芳奏涼州叛回結連

蘭州。獨寇犯鞏昌。擊敗之。以固山貝子吞齊哈爲
平西大將軍。同固山額真宗室韓岱統兵討陝西叛
獨。五月。孟喬芳奏。官兵大破叛獨於鞏昌。臨洮。蘭
州等處城邑俱復。孟喬芳奏。逆獨擁立偽延長王
朱識鋸。遊擊張勇敢之。識鋸就擒。斬之。總督馬國
柱報。官兵大破金逆。恢復九江。饒州等府。移浙督
駐衢州。天津妖婦張氏假稱故明天啟后。同黨王
禮。張天保。製玉印。令旗。被獲。伏誅。六月。孟喬芳奏。
侍郎額賽等大破逆獨於蘭州。其黨悉平。八月。南
贛巡撫劉武元奏。金聲桓王得仁擁衆圍贛城。三月。

官兵敗之。圍解。保定巡撫于清廉奏東明土賊偽
稱天正元年。糾衆數十萬。圍縣城。官兵勦散之。畿南
寧謐。以陳泰爲靖南將軍。與棟阿賴李率泰等。征
福建叛賊。海逆鄭彩等。盤踞長樂連江等縣。陳泰等
夾擊。盡驅出海。恢復二縣。又統師入興化。擒賊渠顧
世臣等。斬之。興郡蕩平。遣英親王同郡王碩驍貝
勒尼堪貝子尚善岳樂等。統兵勦天津土寇。天津
巡撫李猶龍戶部侍郎王公弼坐假招撫爲名。比賊
營會飲。革職爲民。以英親王濟爾哈朗爲定遠大
將軍。統兵討湖廣賊李錦魁。十月。鄭親王報大兵

復曹勝擒賊首李名讓張學允等訊其作亂之由皆
云劉澤清曾致書李化鯨鼓惑賊衆許以內應將化
鯨等一併解京事下所司和碩禮親王代善薨王
太祖武皇帝第二子也宣府赤城兵叛遣肅章京阿爾
津率兵討之劉澤清伏誅十一月偽惠國公李
成棟竊踞南雄勾連土賊犯贛州官兵之成驟棟單
騎遁

加皇叔父攝政王爲皇父攝政王凡進呈本章旨意俱書
皇父攝政王以喀爾喀部二楚虎爾行擬向我邊
界遣英親王等統兵駐大同十二月初三日大同

總兵姜瓖開城叛英親王聞之初四日圍其城遣
固山額真巴顏等載紅衣礮赴大同軍前從英親王
請也○以

上命諭姜瓖曰前因有事北方蒙古故命英親王至大同
與爾等全無干涉若爾等有罪安用此詭計爲天下
主倘舉動如此其誰信之此必有奸人煽惑爾等爾
等如悔罪投誠仍宥其過愆○照舊恩養攝政王獵
至岔道復遣梅勒章京阿喇喜等率八旗兵赴英親
王軍前

順治六年正月遣多羅敬謹郡王尼堪等率兵往平

太原山西巡撫祝世昌奏姜瓖叛黨姚舉等殺運
餉冀寧道王昌齡於平原驛又陷忻州官兵破之石
嶺關復忻州諭大同及山西官員軍民以姜瓖造
作謠言傳欲殺官吏軍民人等誘與俱叛故也譚
泰何洛會等奏去年七月官兵圍困南昌本年正月
克之金聲桓中二矢投水死仍磔屍示衆生擒王得
仁正法江西平英親王奏賊黨劉遷攻代州據其
外城遣郡王博洛等往援大破之遷遁代州圍解
攝政王統內外官兵征勦大同次古爾班口聞喀爾
喀雷汗兵馬距我境十里程因止大同之行議出張

家口遣調外藩蒙古兵。孟喬芳奏官兵平甘州叛
獯。攝政王次察喜兒土察汗漢罕腦兒以馬瘠罷
征喀爾喀。轉趨大同。三月。攝政王拔渾源州城。
尼堪報我師屢勝。斬偽撫姜輝。山西民訴喀喇沁
部兵擅掠民間子女牲畜。攝政王令重治兵罪。還其
人畜。土賊攻陷海州。知州張茂勛州同李士鱗所官
胡崇禮百總李奕蔭死之。賊攻破鉅鹿。署縣事周
維翰死之。逆賊王永強攻陷延安榆林等十九州
縣。巡撫李正志道員夏時芳死之。宜君知縣賈士璋
閣門自縊。應州叅將張祖壽山陰知縣顏永錫俱詣

攝政王軍前降。開豫親王出痘。即日旋師。王攝政
王同母弟。辛未遣人至大同。諭姜瓖降。當恩養
如故。姜瓖啟王言。兵民怨憤。矢志誓死。乞更降一諭。
明指以全活之。若不開恩。臣惟率衆以俟。無他望。
矣。王覽啟。怒甚。逆賊王永強攻臨同官。定邊花馬
池軍民相繼作亂。孟喬芳報甘涼逆。徇米喇印。丁
國棟乘調兵征川。倡衆謀亂。巡撫張文衡道員林維
造。張鵬翼總兵劉良臣。毛鎔。潘雲騰。及遊擊黃得成。
金印。都司王之儒。守備明大年。李廷試。李承澤。陳九
功。俱被執殉難。叅將翟大有戰歿。丁丑。輔政德豫。

親王多鐸薨。攝政王次居庸關。聞訃入臨喪。譚泰等報大軍至南安。遣兵破偽克國公於南康。抵信豐。合圍攻克之。李成棟溺水死。復遣兵底定建昌兩府。擒斬賊渠。江西悉平。端重親王博洛報祖馬路得勝。路賊兵五千來援。姜瓖我軍破之於大同北。山姜瓖率兵出城勦斬殆盡。四月英親王奏復左衛。遣固山貝子胡達海鎮國公吞齊哈輔國公巴布泰等率師往大同。更代英親王等。己巳申刻中宮太后崩。靖南將軍陳泰奏福建二府一州二十九縣俱復全閩底定。寇臨汾州府。以端重親王博洛爲定。

西大將軍由大同統兵往討。遣敬謹親王尼堪由
左衛往圖大同。復諭姜瓖畧曰：前親至大同，閱來
奏語多悖謬，故不復降旨。今英親王爲爾奏請，有悔
過歸誠之意，復憫合城生靈，故復降赦宥，宜速悔悟。
五月，遣圖賴率兵益太原軍。博洛奏：官兵克復
清源、交城、文水、徐溝、祁縣等處。六月，博洛奏：汾州
平。江南、江西、河南總督馬國柱奏：南贛餘孽擁故
明宗室朱由楨作亂，討平之。七月，攝政王帥師征
大同。遣蘇章京敦拜統兵勦河間一路土寇。遣
親王滿達海郡王瓦克達統兵勦朔州、寧武等處。

攝政王至阿魯席巴爾台罷大同之行獵而還。以
河間一路土寇竊發。遣蘇章京沙爾虎達統兵往會
石對酌量勦撫。博洛克復孝義縣。南贛巡撫劉
武元奏廣東餘孽三路度嶺入犯。官軍連破之。擒斬
偽軍門劉國治等九名。八月癸巳。攝政王還京。
陝督孟喬芳報山西逆寇虞允等稱偽永歷年號。陷
蒲州及臨晉河津等縣。臣同侍郎額色往勦。諸縣皆
平。又勦平興安賊渠王國賢。征西大將軍滿達海
奏克復朔州馬邑等處。鄭親王奏大軍自安陸渡
長沙江。抵湘潭。生擒賊渠何騰蛟。克其城。臣親領兵

趙永興奪門入擒偽總兵尹學智等賊渠一隻虎即
錦開風葉辰州遁尚書阿哈尼堪等馳擊賊首王
進才馬進忠即混於寶慶敗之克其城又破袁宗第
二隻虎伯劉體純等十營於紅山固山額真佟圖賴
等屢破賊於衡州又破偽伯胡一青於廣西全州遂
入全州召鄭親王班師還京遣英親王等統兵
往大同孟喬芳奏固山大根特等大破賊於滎河
斬偽帥白瑋又破賊於猗氏斬偽帥張萬金擒偽道
衛登方又章京杜梅等破賊邊三張五党自成等於
解州滎河猗氏解州俱復偽總兵楊振威斬姜瓖

并兄姜琳弟有光首來獻大兵入大同城 九月諭
英親王楊振威等二十三員及家屬兵丁俱着留養
其餘官吏兵民盡行誅戮將大同城垣撤去五尺
征西大將軍滿達海定西大將軍博洛等奏克汾州
斬偽巡撫姜建勛等 十月賊陷福建興化府推官
黎樹聲死之 攝政王帥師征喀爾喀部二楚虎爾
大兵復潞安 官兵克榆林 滿達海奏官兵克
復平遙太谷三縣沁遼二州屯留襄垣榆社武鄉等
縣俱降 召親王滿達海輔國公薩弼分兵回京留
郡王瓦克達等勦撫山西 十一月攝政王自喀屯

考
似有脫字

布喇克班師。十二月，鄭親王奏廣西賊渠焦璉分三路寇全州。順承郡王勒克德渾等擊敗之。又敗賊渠曹禎于於道州。又梅勒章京達爾等敗賊渠周進唐熊兆藻等於永州。固山額真佟圖賴遣兵破賊於常寧縣。尚書阿哈尼堪遣兵破賊於沅州。臣又遣噶喇昂邦努山等勦二隻虎於烏撒城，克其城，旋追勦於艾考洞。斬偽閣部楊鼐等三人。遣肅章京宜爾都齊等大破賊渠郝永忠，攻克黎平府。永忠攜妻子遁。猓孽丁國棟、黑城印路、肅州城總兵張勇等夾攻斬國棟、城印、肅州平。

順治七年正月山西巡撫奏復永寧州寧鄉縣二城。
官兵復廣東南雄縣。鄭親王班師回京。攝政
王、納肅親王福金、博爾濟錦氏。二月瓦克達報大
兵平定潞安平陽澤州。廢官李建泰據太平。我兵圍
之。勢迫出降。命誅建泰。并其兄弟子姪黨羽。瓦克
達報平定平陽府三十六州縣。四月孟喬芳奏甘
肅賊米喇印授首於水泉諸城。次第俱復。五月
攝政王率諸王大臣親迎朝鮮國送來福金於連山。
是日成婚。謙郡王瓦克達班師還京。八月。上
孝烈武皇后尊諡曰孝烈恭敏獻哲仁和贊天儼聖武皇

后耐享

太廟頒詔大赦

九月海寇鄭成功犯潮州總兵王邦俊

破之

十月福建官兵勦邵武擒僞伯洪國王僞總

兵李安民僞閣部揭重熙斬之

十一月壬戌攝政

王以有疾獵於邊外

十二月戊子薨於喀喇城年

三十九

丙申柩至

上迎於東直門五里外跪奠三爵大慟

丁酉諸王大臣

等奏

己亥

詔曰

太宗文皇帝升遐之時羣臣擁戴皇父攝政王王堅持雅

讓扶立朕躬。平定中原。統一天下。至德豐功。千古無
兩。不幸於順治七年十二月初九日戌時。以疾上賓。
朕心摧痛。中外喪儀。合依帝禮。嗚呼。恩義兼隆。莫報
如天之德。榮哀備至。式符薄海之心。甲辰追尊攝
政王爲懋德修道廣業定功安民立政誠敬義皇帝。
廟號成宗。

順治八年正月。英親王阿濟格有罪。鞫實幽禁。王攝

政王同母兄也。庚申。

上親御太和殿。赦天下。十九日丁卯。升祔。
孝端正敬仁懿莊敏輔天協聖文皇后於

太廟

追尊成宗義皇帝妃義皇后同祔

太廟

禮成覃恩赦天下詔語畧云當朕躬嗣服之始謙讓

彌光迨王師滅賊之時勛猷茂著闢輿圖爲一統攝

大政者七年云云二月蘇克薩哈詹岱穆濟倫首

告睿王不令人知備有八補黃袍大東珠素珠黑狐

裘子又欲率兩固山駐永平謀篡大位會出獵未往

訊實籍所屬家產人口其養子多爾博女東莪給信

郡王 己亥

詔曰鄭親王孫親王等同大臣合詞奏言

太宗文皇帝賓天時臣等扶立皇上並無欲立攝政王之

議惟伊弟豫郡王唆詞勸進彼時皇上曾將朝政付
伊與鄭親王共理逮後獨擅威權不令鄭親王預政
以親弟豫郡王爲輔政叔王背誓肆行自稱皇父攝
政王又親到皇宮院內以爲

太宗文皇帝之位原係奪竄以挾制皇上又逼死肅親王
遂納其妃凡批票本章概用皇上攝政王之旨又悖
理入生母於

太廟此等情形謹冒死奏聞伏願重加處治朕反覆詳思
王大臣豈有虛言不意伊近侍蘇克薩哈等首告伊
王審問皆實看來謀篡果真謹告

天地

宗廟

社稷將伊母子併妻罷封撤廟享。停其恩赦。封肅親王。

子富壽為和碩顯親王。封鄭親王子富爾敦為世

子。濟度為多羅簡郡王。勤度為多羅敦郡王。十月

阿濟格自盡。先是英親王得罪後。又搜獲藏刀四口。

諸王等議英王前犯大罪。

皇上從寬免死。給與三百婦女。一切養贍。尚仍起亂心。藏

刀四口。坐此止給婦女十口。及本身衣服。其餘人口

牲畜金銀俱行追取。該部從外部給與飯食。至是又

口出妄語燒燬監房諸王大臣議不宜再留奉
旨令自盡

順治九年三月鄭親王等會議信親王多尼父豫王
與睿王同母兄弟原議盡削王爵但以行兵有功應
降爲多羅郡王從之

順治十年三月

諭工部睿王墳園因伊罪惡竟行廢壞似屬不忍其房屋
門牆俱着修理柱用黑色仍命信郡王撥人看守

八月

諭禮部自古立后皆慎重遴選使可母儀天下今后乃睿

王於朕幼時因親定婚未經選擇宮閭參商已歷三載淑善難期不足仰承

宗廟之重謹於八月二十五日奏聞

皇太后降為靜妃改居側宮

順治十二年正月副理事官彭長庚言諸王俱樹勛勞而睿王之功為冠當

太宗上賓堅持盟誓扶立

皇上迨郡王阿達禮貝子碩託私謀擁戴睿王持大義立置典刑後睿王大權在握於時

皇上沖齡遠在盛京彼若肆然自帝孰能禦之而乃先驅

綏定恭迎

鑾輿此功誠不可泯也是以當其初薨尚無異議乃為時
無幾朝論紛起論罪削爵毀滅過甚即肅王妃清亂
一事愆尤莫掩然而功多罪少應存議親議故之條
至於私匿帝服御用等物必由彼傳諭織造早晚賫
送進御彼時暫停王府豈可與一切私匿御用者同
例而議為不軌耶方今水旱相繼似同風雷之警或
其中不無冤抑乞賜昭雪云云

命王大臣密議

三月一等子許爾安

許定言睿親王罪

固難辭而功亦不可泯也乞篤親親之誼隆敬大臣

之典云云

命密議議政王貝勒大臣等議彭長庚欺誑妄言大千國紀許爾安與長庚無異奉

旨皆流徙寧古塔

乾隆四十三年正月奉

旨睦親彰善王政宜先繼絕昭屈聖經所重朕自臨御以來聞日恭閱

列祖

列宗實錄一冊因得備知

祖宗創業艱難及爾時懿親蓋臣勤勞佐命底定中原偉

伐殊功實爲從古所未有而當時策勲錫爵榮號崇封所以酬答者本從優厚迨其後或有及身緣事旋被降削者或有子孫承襲更易封號者迄今平情準理若不爲之溯述闡揚追復舊恩於心實有所未愜因念睿親王多爾袞當開國時首先統衆入關掃蕩賊氛肅清宮禁分遣諸王追殲流寇撫定疆陲一切創制規模皆所經畫尋即奉迎

世祖

車駕入都定國開基以成一統之業厥功最著顧以攝政有年威福不無專擅諸王大臣未免畏而忌之遂致歿後爲蘇克薩哈等所構殺歿於其屬人首告

誣以謀逆經諸王定罪除封其時我

世祖章皇帝實尚在沖齡未嘗親政也夫睿王東萌異志則方兵權在握何事不可爲且吳三桂之所迎勝國舊臣之所奉止知有攝政王耳其勢更無難號召即我滿洲大臣心存忠篤者自必不肯順從然彼誠圖爲不軌無難潛鋤異己以逞逆謀乃不於彼時因利乘便直至身後以斂服僭用明黃龍袞指爲覬覦之證有是情理乎況英親王阿濟格其同母兄也於追捕流賊回京時誑報李自成身死且不候

旨班師睿王即遣員斥責其非並免王公等往迎之禮入

因阿濟格出征背令巡撫李鎧釋免逮問道員及擅
至鄂爾多斯土默特取馬令議其罪降爲郡王平日
辦理政務秉公持正若此是果有叛志無叛志乎又
實錄載睿王集諸王貝勒貝子公大臣等道人傳語曰今
觀諸王貝勒大臣但知諂媚於予未見有尊崇

皇上者予豈能容此昔

太宗升遐嗣君未立英王豫王跪請予卽尊位予曰爾等
若如此予當自刎誓死不從遂奉

皇上繼承大統似此危疑之時以予爲君子尚不可今乃
不敬

皇上而媚予予何能容自今以後有盡忠
皇上者予用之愛之其不盡忠不敬事

皇上者雖媚予予不爾宥也且云

太宗恩育予躬所以特異於諸子弟者蓋深信諸子之成
立惟予能成立之每覽

寶錄至此未嘗不爲之隳淚則王之立心行事實能篤忠

盡感

厚恩深明君臣大義尤爲史冊所罕覲使王彼時如宋太
宗之處心積慮則豈肯復以死固辭而不爲邪說搖
惑耶乃令王之身後久抱不白之冤於泉壤心甚憫

焉。假令王之逆跡當時稍有左驗，削除之罪果出於我。

世祖聖裁，朕亦寧敢復翻成案，乃實由宵小奸謀構成冤獄，而王之政績載在。

實錄者皆有大功，而無叛逆之跡，又豈可不為之昭雪乎？昨於乾隆三十八年，因其塋域久荒，特敕量為繕葺，並准其近支以時祭掃。然以王之生平盡心王室，尚不足以慰彼成勞，朕以為應加恩，復還睿親王封號。追謚曰忠補入。

玉牒並令補繼襲封，照親王園寢制度脩其塋墓，仍令太

常寺春秋致祭。其原傳尚有未經詳叙者。並交國史館恭照。

實錄所載敬謹輯錄添補宗室王公功績傳用昭彰闡宗勛至意。